



CLAUSTRA GLION «Refuorma crescha avegnir»

(fmr/gc) Igl onn 2020 han las soras da Glion vului reflectar davart il tema: «Refuorma crescha avegnir». Era sche la cuminonza claustrala daventa pli veglia, vul ella buca star culs mauns en crusch e simplamein spitgar sin quei che vegn tier ellas. Ellas vulan crear sezzas il futur. Aschia vegn fatg patratgs, tgei che savess esser nizivel per las generaziuns vegnentas. Per quei rogan las soras era ella liturgia: Tar-metta ora Tiu spért e la fatscha dalla tiara daventa nova.»

La claustra ha schau installar uonn discretamein indrezs fotovoltaics sin ina surfatscha da 1000 m quadrat. – Dapi dus onns ein las soras s'occupadas cun in project per la pasch. Ils 13 da november ei l'Uniun «Forum per promover la pasch» vegnida fundada. Vid stad 2021 duess igl empren Forum ver liug ella Casa da sentupada ella claustra.

Avon 100 onns ei la Procura dalla missiun vegnida realisada a Glion. Ils 7 d'october 1920, pia avon 100 onns, eran las soras Thomasa Monn e Carmelina Paly, da Cumpadials, idas cun lur consora Simonetta Brunner da Domat, ellas missiuns en China. Quei seigi stau in'enschat-ta nundetg curaschusa, bunamein aventurusa. – Cul temps ei vegniu fundau in «Cerchel d'amitgs». Persunas interessadas s'entaupan per dilucidar ina tematica speciala. Dapresent stattan ils quater elements el center: aua, fiug, aria e tiara. Il settember ha ina sora preparau e dau impuls tenor il tema: «Fagei subdita la tiara a vusezzi – il Papa vesa verd».

Ils 7 da mars d'uonn vessen las soras da Glion commemorau bugen la consecraziun da lur baselgia avon 50 onns. Per via dalla pandemia coronavirus ha quella festividat denton stuiu vegnir annullada. Ins spera da saver prender suenter quei igl onn vegnent.

2021 eisi 800 onns dapi la mort da s. Dumeni – pia in onn giubilar per igl uorden dils predicaturs. La devisa dil giubileum secloma: «A meisa cun s. Dumeni». Surlunder duei vegnir reflectau specialme in l'auter onn.



La claustra dominicana a Glion.

MAD